



MALAYSIA

PENYATA RASMI PARLIMEN

Parliamentary Debates

KAMAR KHAS

Special Chamber

PARLIMEN KEEMPAT BELAS
PENGAL KETIGA
MESYUARAT KEDUA

K A N D U N G A N

UCAPAN DI BAWAH USUL BERKENAAN PERKARA TADBIR KERAJAAN [P.M. 17]:

- **Status Terkini Kes Persatuan Penduduk Jalan Bentara Seksyen 5, Bandar Mahkota Cheras, Cheras, Selangor (2011) (No.PPM:PPM-009-10-13092011**
- YB. Dr. Ong Kian Ming (*Bangi*) (Halaman 1)
- **Garisan Pembahagi Jalan (Warna Putih) Tidak Kelihatan di Sepanjang Jalan Utama (Jalan raya di Bawah JKR) dalam Parlimen Tebrau**
- YB. Tuan Steven Choong Shiau Yoon (*Tebrau*) (Halaman 3)

**MALAYSIA
KAMAR KHAS
PARLIMEN KEEMPAT BELAS
PENGKAL KETIGA
MESYUARAT KEDUA**

Rabu, 29 Julai 2020

Mesyuarat dimulakan pada pukul 2.30 petang

DOA

*[Timbalan Yang di-Pertua (Dato' Sri Azalina Othman Said)
mempengerusikan Mesyuarat]*

**UCAPAN DI BAWAH USUL
BERKENAAN PERKARA TADBIR KERAJAAN (P.M. 17)**

**Status Terkini Kes Persatuan Penduduk Jalan Bentara Seksyen 5,
Bandar Mahkota Cheras, Cheras, Selangor (2011)
(No. PPM: PPM-009-10-13092011)**

2.34 ptg.

Dr. Ong Kian Ming [Bangi]: Terima kasih Tuan Yang di-Pertua. Tuan Yang di-Pertua, tajuk ucapan saya adalah berkenaan dengan status terkini kes Persatuan Penduduk Jalan Bentara Seksyen 5, Bandar Mahkota Cheras, Cheras, Selangor (2011) (No. PPM: PPM-009-10-13092011).

Tuan Yang di-Pertua, persatuan penduduk yang dinyatakan di atas telah menghantar satu surat rayuan bersama dengan satu surat sokongan daripada Ahli Parlimen Bangi iaitu saya, Dr. Ong Kian Ming kepada Bahagian Pendaftaran Negara dan Pertubuhan (ROS), Kementerian Dalam Negeri melalui ROS Selangor pada 1 Februari 2019 untuk mengetepikan pembatalan pendaftaran persatuan tersebut (Perintah Pembatalan Seksyen 13(1)(c)(iv) bertarikh 7 Januari 2019).

Surat rayuan tersebut telah mengemukakan penjelasan yang terperinci dan cukup meyakinkan berserta dengan cadangan langkah pembetulan. Sepanjang operasi persatuan tersebut, ia telah banyak menyumbang kepada peningkatan keselamatan di kawasan perumahan tersebut dan pencapaian ini adalah disokong oleh data yang menunjukkan kes pecah rumah telah menurun daripada purata 1.7 kes setiap bulan kepada kosong selepas projek keselamatan dijalankan oleh persatuan tersebut.

Sampai hari ini iaitu 20 Julai 2020 dan saya baru *check* dengan mereka iaitu hampir 17 bulan selepas surat rayuan tersebut diterima oleh pihak ROS Selangor, persatuan tersebut belum lagi menerima apa-apa balasan rasmi

daripada pihak kementerian. Saya memohon kepada pihak kementerian untuk mempertimbangkan permohonan rayuan persatuan dan memberikan satu lagi peluang kepada persatuan ini untuk memperbetulkan kesilapan yang berlaku sebelum ini. Kami berharap permohonan tersebut boleh diteliti dan diselesaikan dengan secepat mungkin kerana ia telah dikemukakan hampir 17 bulan yang lalu.

Sekian, terima kasih.

Timbalan Yang di-Pertua [Dato' Sri Azalina Othman Said]: Yang Berhormat Menteri sila jawab. Sila.

2.36 ptg.

Timbalan Menteri Dalam Negeri II [Tuan Jonathan bin Yasin]: Tuan Yang di-Pertua, selamat petang. Kepada rakan saya, Yang Berhormat Bangi, ini adalah jawapan daripada pihak kementerian.

Persatuan Penduduk Jalan Bentara Seksyen 5, Bandar Mahkota Cheras, Cheras, Selangor (2011) adalah sebuah pertubuhan yang berdaftar di bawah Akta Pertubuhan 1966 iaitu di bawah Akta 335 dengan nombor pendaftaran PPM-009-10-13092011.

Namun begitu, pertubuhan berkenaan telah dibatalkan pada 7 Januari 2019 selaras dengan peruntukan di bawah Seksyen 13(1)(c)(iv), Akta Pertubuhan 1966 (Akta 335) kerana pertubuhan ini telah dengan bersengaja melanggar peruntukan undang-undang berdaftar pertubuhan dan Akta 335 seperti mana berikut:

- (i) telah melanggar fasal 4 berkaitan dengan keahlian kerana permohonan keahlian tidak dicadang dan disokong, seterusnya jawatankuasa tidak meluluskan permohonan keahlian;
- (ii) telah melanggar fasal 8(5) (Jawatankuasa) kerana notis mesyuarat jawatankuasa tidak dikeluarkan kepada ahli jawatankuasa;
- (iii) telah melanggar fasal 9(3) (Kewajipan-kewajipan Pegawai) di mana Setiausaha Persatuan tidak mempunyai maklumat terperinci ahli;
- (iv) telah melanggar fasal 10(2) berkaitan kewangan kerana Bendahari menyimpan wang tunai melebihi RM1.00 pada 28 Februari 2018; dan
- (v) telah melanggar fasal 10(4) (Kewangan) kerana perbelanjaan yang lebih daripada RM1.00 dilakukan

tanpa mendapat kebenaran mesyuarat agung terlebih dahulu.

Dalam hal ini, pembatalan pertubuhan ini mengambil kira bahawa kesalahan yang dilakukan adalah amat berat kerana melibatkan kegagalan mematuhi undang-undang berdaftar pertubuhan itu sendiri. Susulan daripada itu, pada 1 Februari 2019, pertubuhan telah mengemukakan permohonan rayuan di bawah seksyen 18, Akta 335 agar pembatalan pendaftaran pertubuhan ini ditarik balik kepada Kementerian Dalam Negeri melalui Jabatan Pendaftaran Pertubuhan Malaysia (JPPM).

Dalam proses permohonan rayuan berkenaan, semakan JPPM mendapati dokumen yang dikemukakan pertubuhan adalah tidak lengkap. Setelah isu dokumen diselesaikan, JPPM telah mengemukakan permohonan rayuan berkenaan kepada KDN pada 12 November 2019. Seterusnya, permohonan rayuan berkenaan kini sedang dalam tindakan akhir KDN.

Untuk makluman Ahli Yang Berhormat, kementerian melaksanakan tindakan segera terhadap semua permohonan rayuan pertubuhan secara berperingkat termasuklah permohonan rayuan pertubuhan yang diterima dan diproses oleh KDN sepanjang tempoh Perintah Kawalan Pergerakan (PKP) mulai 18 Mac 2020.

Proses pertimbangan permohonan rayuan pertubuhan melibatkan penelitian secara menyeluruh ke atas dokumen-dokumen yang dikemukakan bersama justifikasi yang kukuh. Sekiranya terdapat isu seperti dokumen yang tidak lengkap atau keadaan mendesak yang memerlukan siasatan, maka masa yang lebih panjang akan diambil sebelum permohonan tersebut dapat diproses ke peringkat seterusnya.

Sekian, terima kasih Tuan Yang di-Pertua.

**Garisan Pembahagi Jalan (Warna Putih) Tidak Kelihatan
di Sepanjang Jalan Utama (Jalan raya di Bawah JKR)
dalam Parlimen Tebrau**

2.40 ptg.

Tuan Steven Choong Shiau Yoon [Tebrau]: Tuan Yang di-Pertua, Yang Berhormat Menteri Kerja Raya, ingin saya menyampaikan hasrat rakyat Parlimen Tebrau berkenaan kedudukan terdesak iaitu garisan pembahagi jalan di jalan utama Parlimen Tebrau.

■1440

Pusat Khidmat telah membuat tinjauan di sekitar laluan sepanjang Jalan Utama Seksyen 0 hingga Seksyen 22(9) sepanjang 30(4) kilometer pergi dan balik mulai Jalan Tebrau di Kg. Baru Pandan, Jalan Pandan sehingga Jalan Kota Tinggi sampai Taman Cemerlang, sempadan dengan Parlimen Kota Tinggi dan Kulai mendapati kebanyakan garisan putih pembahagi jalan laluan tersebut semakin hilang dan tidak jelas.

Ketiadaan garisan putih pembahagi jalan yang jelas ternyata menjadi satu masalah besar buat pengguna jalan raya dan jika keadaan ini terus dibiarkan, pengguna jalan berkemungkinan besar berhadapan dengan risiko kemalangan jalan raya. Ini adalah kerana:

- (i) pemandu kenderaan tidak dapat kenal pasti lorong memandu mereka dan ini membahayakan pemandu yang lain;
- (ii) situasi itu tambah menyukarkan pemandu kenderaan dalam memastikan jarak kenderaan masing-masing terutamanya ketika waktu hujan lebat dan malam;
- (iii) pemandu dari daerah lain yang tidak biasa dengan bentuk jalan atau kerosakan yang berlaku di jalan tersebut sentiasa terdedah dengan risiko kemalangan kerana tidak tahu lorong mana yang betul;
- (iv) lebih-lebih lagi pada waktu malam, banyak lampu jalan tidak nyala menjadikan keadaan lebih susah pada penggunaannya; dan
- (v) isu ketiadaan garisan putih pembahagi jalan dalam Parlimen Tebrau telah dikemukakan oleh rakyat Tebrau sejak lima tahun dahulu.

Persoalan saya ialah:

- (i) Menteri Kerja Raya telah meluluskan peruntukan sebanyak RM510,000 pada bulan April 2019 bagi tujuan mengecat garisan putih di jalan utama Tebrau tetapi saya diberitahu oleh JKR Daerah Johor Bahru bahawa RM400,000 telah diguna pakai untuk penyelenggaraan lain dan hanya RM110,000 diguna untuk mengecat garisan putih. Saya memohon Yang Berhormat Menteri menyatakan adakah penggunaan peruntukan yang diluluskan untuk satu tujuan tetapi

sebahagian itu digunakan untuk tujuan lain satu amalan biasa di JKR?; dan

- (ii) setiap kali apabila dibuat laporan kepada JKR JB, jawapannya ialah peruntukan disalurkan dari Pusat tidak mencukupi. Soalan saya ialah agaknya bilakah penggarisan putih dan juga lampu-lampu jalan yang tidak menyala dapat ditunaikan agar rakyat boleh guna jalan raya dengan lebih selamat.

Sekian, terima kasih.

Timbalan Yang di-Pertua [Dato' Sri Azalina Othman Said]: Minta Yang Berhormat Menteri untuk menjawab.

2.44 ptg.

Timbalan Menteri Kerja Raya [Dato' Eddin Syazlee bin Shith]: *Bismillahir Rahmanir Rahim.* Dengan izin Tuan Yang di-Pertua, untuk makluman Ahli Yang Berhormat, Kementerian Kerja Raya sentiasa berusaha untuk memastikan Jalan Persekutuan di negara ini berada dalam keadaan selamat dan selesa.

Bagi penyelenggaraan jalan persekutuan, kementerian ini melalui Jabatan Kerja Raya telah mengeluarkan satu *standard operating procedure* (SOP) senggara jalan untuk dipatuhi. Prosedur ini diguna pakai untuk semua projek penyelenggaraan jalan persekutuan yang dilaksanakan di bawah tanggungjawab kementerian melalui arahan kerja yang dikeluarkan kepada syarikat konsesi atau dilaksanakan secara jabatan.

Pihak JKR dan syarikat konsesi yang dilantik oleh kerajaan sentiasa melaksanakan pemantauan di jalan persekutuan bagi memastikan keadaan jalan sentiasa berkeadaan baik dan selamat untuk digunakan oleh pengguna melalui pemeriksaan rutin berdasarkan SOP yang telah ditetapkan.

Selanjutnya untuk makluman Ahli Yang Berhormat, jalan yang dimaksudkan adalah laluan FT003 seksyen 9 sehingga seksyen 15 jalan dari Kampung Pandan ke Desa Cemerlang. Jumlah peruntukan kerja penyelenggaraan Jalan Persekutuan Daerah Johor Bahru bagi kerja-kerja di bawah Program Berkala Bukan Pavemen (BBP) tahun 2019 termasuk kerja mengecat semula garisan jalan adalah sebanyak RM1,509,000.

Daripada jumlah ini, peruntukan yang diluluskan bagi kerja BBP di laluan FT003 Johor Bahru bertarikh 12 April 2019 adalah sebanyak RM610,000 bagi empat perihal kerja iaitu kerja-kerja menggantikan *guardrail*

rosak sebanyak dua kerja, kerja-kerja mengecat semula garisan jalan dan kerja-kerja memasang *crush cushion* perabot jalan.

Untuk makluman Ahli Yang Berhormat selanjutnya, bagi tahun 2020, peruntukan yang diluluskan bagi kerja di bawah BBP di laluan FT003 Johor Bahru adalah sebanyak RM371,029.68 manakala bagi kerja di bawah Program Berkala Pavemen (BP) sebanyak RM1,350,000.

Untuk makluman Ahli Yang Berhormat, kelulusan pelaksanaan kerja adalah berdasarkan kepada:

- (i) laporan kerosakan yang dikemukakan oleh JKR daerah dan negeri; dan
- (ii) mengikut senarai keutamaan dengan mendahulukan kerja-kerja yang lebih kritikal.

Manakala kelulusan peruntukan adalah tertakluk kepada Kementerian Kewangan Malaysia.

Sekian, terima kasih.

Timbalan Yang di-Pertua [Dato' Sri Azalina Othman Said]: Terima kasih. Ahli-ahli Yang Berhormat, Mesyuarat Kamar Khas hari ini ditangguhkan sehingga jam 2.30 petang, hari Isnin, 3 Ogos 2020.

[Kamar Khas ditangguhkan pada pukul 2.47 petang]